



Di frute, cjavei ros e pivicjîs, no savevi ce ch'al vûl dî diari: si veve un cuader dome pai compîts di cjase e li a si ju faseve. Subite dopo mangjât (su la taule sîs dîs su siet e jere la mignestre di fasui e s i m p r i cun dentri il rîs "originario") par sghindâ di lavâ i plats o levi in bagn, zurant a mê mari che no podevi fâ di mancûl; no o jeri jo furbe e jere invezit mê mari che a 'nd veve tante pazienze. Poben, dopo jessi stade in bagn, come mosse strategjiche, di solit i plats ju veve za fâts mê mari e jo mi metevi a fâ i compits di buine uce, parcè chel sî che a mi plaseve!

Intes scuclis mediis, a Tor di Zuin, il siôr Pascut, viodût che i libris par solit no ju paiavi par vie de medie alte dai vôts, a mi deve dongje cui libris un diari che piês di cussî nol podeve jessi, a nol veve nuie di ninin, di ce ridi o di ce imparâ, le robe plui di avilizion pussibil...

Cuant che o soi lade al Zanon, ancje li a vignivin incuintri cui libris, simpri par vie de medie scolastiche dai vôts, ma inte librerie di plaçâl Cavedalis a mi sgnacavin simpri il diari di Jacovitti, che, o vês di crodimi, no podevi viodilu cun dutis chês fetis di salam e chei stupidats di païasos cul sombrero; o sai che i plasevin a tancj di lôr ma a mi mi stevin propit sul stomi e o vevi cetante invidie par la mê compagne di banc, Daniela, che e veve (biade jê)

il diari di Charlie Brown!

Cumò o sin rivâts a none Barbara che, par joibe, à di parecjâ doi compîts par cjase: il prin par Maurizio Mattiuzza e il secont par Franco Marchetta. Cumò o soi sigure che cualchidun a si domande parcè che soi chi daûr a piedi timp, a tedeâ, invezit di fâ alc di bon: il probleme al è che fin che si fevele di scrivi in prime persone, tabaiote come ch'o soi, mi va di Diu, e ti scrîf cun gjonde un biel pocjîs di fufignîs, MA cui dialics.... mi è une vore penze le robe e se o podès fâlu mi sierarès in bagn come che o fasevi cun mê mari, ma le frute russite e plene di pivicjîs cumò e je diventade none Barbara e à di imparâ ancje a fâ ancje chel che no i sgniche cuissà ce: par usgnot o ài tirât indaûr il cûl, ma di doman la solfe e à di cambiâ, lu zuri!

di Barbara Battel